


地藏菩薩本願經

附  
懺  
儀

風陵文庫

文庫19

F207





地藏菩薩本願經原序

地藏經譯於唐實叉難陀而時本譯人為法  
燈法炬不著世代不載里族於藏無所考雖  
小異大同理固無傷而覈實傳信必應有據  
乃比丘性安者承先志刻唐譯易之其詳具  
如冢宰陸公序矣或謂是經諄諄乎眾生因  
果地獄名相無復玄論不足新世耳目奚用  
是訂正為噫布帛菽粟平時不如明珠饑年



澤田瑞穗

F0207

則為至寶。救末法之饑年。是經其可少耶。若夫眾生度盡。方證菩提。地獄未空。誓不成佛。探玄上士。試終身味之。

沙門祿宏筆記

香讚

爐香乍爇。法界蒙熏。諸佛海會。悉遙聞。隨處結祥雲。誠意方殷。諸佛現全身。

南無香雲蓋菩薩摩訶薩

三稱

覺林菩薩偈

華嚴第四會。夜摩天宮。無量菩薩來集。說偈讚佛。爾時覺林菩薩。承佛威力。徧觀十方。而說頌言。

譬如工畫師。分布諸彩色。虛妄取異相。大種無差別。大種中無色。色中無大種。亦不離大種。而有色可得。心中無彩畫。彩畫中無心。然不離於心。有彩畫可得。彼心恆不住。無量難

思議示現一切色。各各不相知。譬如工畫師。不能知自心。而由心故畫諸法性。如是心如工畫師。能畫諸世間。五蘊悉從生。無法而不造。如心佛亦爾。如佛眾生然。應知佛與心。體性皆無盡。若人知心行。普造諸世間。是人則見佛。了佛真實性。心不住於身。身亦不住心。而能作佛事。自在未曾有。若人欲了知。三世一切佛。應觀法界性。一切唯心造。昔有人云。一偈之功。

能破地獄。何況此全一章。偈耶。願思此言。勉共傳誦。

南無地藏王菩薩 三稱

讚

音起稽首本然淨心地 無盡佛藏大慈尊  
南方世界湧香雲 香雨花雲及花雨  
寶雨寶雲無數種 為祥為瑞徧莊嚴  
天人問佛是何因 佛言地藏菩薩至  
三世如來同讚歎 十方菩薩共歸依

我今宿植善因緣 稱揚地藏真功德  
慈因積善誓救眾生 手中金錫振開地獄之  
門。掌上明珠光攝大千世界。智慧音裏吉祥  
雲中。爲閻浮提苦眾生作大證明功德主。大  
悲大願大聖大慈本尊地藏菩薩摩訶薩。

地藏菩薩本願經卷上

唐于闐國三藏沙門實叉難陀譯

忉利天宮神通品第一

如是我聞。一時佛在忉利天。爲母說法。爾時  
十方無量世界。不可說不可說一切諸佛。及  
大菩薩摩訶薩。皆來集會。讚歎釋迦牟尼佛。  
能於五濁惡世。現不可思議大智慧神通之  
力。調伏剛強眾生。知苦樂法。各遣侍者。問訊

世尊。是時如來含笑。放種種大光明雲。所謂  
 大圓滿光明雲。大慈悲光明雲。大智慧光明  
 雲。大般若光明雲。大三昧光明雲。大吉祥光  
 明雲。大福德光明雲。大功德光明雲。大歸依  
 光明雲。大讚歎光明雲。放如是等不可說光  
 明雲已。又出種種微妙之音。所謂檀波羅蜜  
 音。尸波羅蜜音。音聲。羸提波羅蜜音。毗離耶波羅  
 蜜音。禪波羅蜜音。般若波羅蜜音。慈悲音。喜

捨音。解脫音。無漏音。智慧音。大智慧音。師子  
 吼音。大師子吼音。雲雷音。大雲雷音。出如是  
 等不可說不可說音已。娑婆世界及他方國  
 土。有無量億天龍鬼神。亦集忉利天宮。所謂  
 四天王天。忉利天。焰摩天。兜率天。化樂天。他  
 化天。梵身天。梵輔天。梵眾天。大梵天。光天。少  
 光天。無量光天。光音天。淨天。少淨天。無量淨  
 天。徧淨天。嚴飾天。無量嚴飾天。嚴飾果實天。

無想天。無煩天。無熱天。善見天。大善見天。色  
究竟天。摩醯首羅天。乃至非想非非想天。一  
切天眾。龍眾。鬼神等眾。悉來集會。復有他方  
國土。及娑婆世界。海神。江神。河神。樹神。山神。  
地神。川澤神。苗稼神。晝神。夜神。空神。天神。飲  
食神。草木神。如是等神。皆來集會。復有他方  
國土。及娑婆世界。諸大鬼王。所謂惡目鬼王。  
噉<sup>音啖</sup>血鬼王。噉精氣鬼王。噉胎卵鬼王。行病鬼

王。攝毒鬼王。慈心鬼王。福利鬼王。大愛敬鬼  
王。如是等鬼王。皆來集會。爾時釋迦牟尼佛。  
告文殊師利法王子菩薩摩訶薩。汝觀是一  
切諸佛菩薩。及天龍鬼神。此世界他世界。此  
國土他國土。如是今來集會。忉利天者。汝知  
數不。文殊師利白佛言。世尊。若以我之神力。  
千劫測度。不能得知。佛告文殊師利。吾以佛  
眼觀故。猶不盡數。此皆地藏菩薩。久遠劫來

已度當度未度已成就當成就未成就文殊  
師利白佛言世尊我已過去久修善根證無  
礙智聞佛所言卽當信受小果聲聞天龍八  
部及未來世諸眾生等雖聞如來誠實之語  
必懷疑惑設使頂受未免興謗惟願世尊廣  
說地藏菩薩摩訶薩因地作何行立何願而  
能成就不思議事佛告文殊師利譬如三千  
大千世界所有草木叢林稻麻竹葦山石微

塵一物一數作一恆河一恆河滿沙一沙一  
界一界之內一塵一劫一劫之內所積塵數  
盡充爲劫地藏菩薩證十地果位以來千倍  
多於是數何況地藏菩薩在聲聞辟支佛地  
文殊師利此菩薩威神誓願不可思議若未  
來世有善男子善女人聞是菩薩名字或讚  
歎或瞻禮或稱名或供養乃至彩畫刻鏤塑  
漆形像是人當得百返生於三十三天文殊

音彌音訖



師利。地藏菩薩摩訶薩。於過去久遠不可說不可說劫前。身為大長者子。時世有佛。號曰師子奮迅。具足萬行如來。時長者子。見佛相好。千福莊嚴。因問彼佛。作何行願。而得此相。時師子奮迅。具足萬行如來。告長者子言。欲證此身。當須久遠。度脫一切受苦眾生。文殊師利。時長者子。因發願言。我今盡未來際。不可計劫。為是罪苦六道眾生。廣設方便。盡令

解脫。而我自身。方成佛道。以是於彼佛前。立斯大願。于今百千萬億那由他。不可說劫。尚為菩薩。又於過去。不可思議阿僧祇劫。時世有佛。號覺華定自在王如來。彼佛壽命。四百千萬億阿僧祇劫。像法之中。有一婆羅門女。宿福深厚。眾所欽敬。行住坐臥。諸天衛護。其母信邪。常輕三寶。是時聖女。廣設方便。勸誘其母。令生正見。而此女母。未全生信。不久命

終魂神墮在無間地獄。時婆羅門女知母在世。不信因果。計當隨業。必生惡趣。遂賣家宅。廣求香花。及諸供具。於佛塔寺。大興供養。見覺華定自在王如來形像。在一寺中。塑畫威容。端嚴畢備。時婆羅門女。瞻禮尊容。倍生敬仰。私自念言。佛名大覺。具一切智。若在世時。我母死後。倘來問佛。必知處所。垂泣良久。瞻戀如來。忽聞空中聲曰。泣者聖女。勿至悲哀。

我今示汝母之去處。婆羅門女合掌向空。而白空曰。是何神德。寬我憂慮。我自失母以來。晝夜憶戀音練無處可問。知所生界。是時空中有聲。再報女曰。我是汝所瞻禮者。過去覺華定自在王如來。見汝憶母。倍於常情。眾生之分。故來告示。婆羅門女聞此聲已。舉身自撲。支節皆損。左右扶持。良久方甦。而白空曰。願佛慈愍。速說我母所生之處。我今身心將死不

久時覺華定自在王如來告聖女曰。汝供養畢。但早返舍。端坐思惟。吾之名號。卽當知母所生去處。時婆羅門女尋禮佛已。卽歸其舍。以憶母故。端坐念覺華定自在王如來。經一日一夜。忽自見身到一海邊。其水湧沸。多諸惡獸。盡復鐵身。飛走海上。東西馳逐。見諸男子女人。百千萬數。出沒海中。被諸惡獸爭取食噉。又見夜叉。其形各異。或多手。多眼。多足。

多頭。口牙外出。其利如劍。驅諸罪人。使近惡獸。復自搏攫。頭足相受。其形萬類。不敢久視。時婆羅門女以念佛力故。自然無懼。有一鬼王名曰無毒。稽首來迎。白聖女曰。善哉聖女。何緣來此。婆羅門女問鬼王曰。此是何處。無毒答曰。此是大鐵圍山。西面第一重海。聖女問曰。我聞鐵圍之內。地獄在中。是事實不。無毒答曰。實有地獄。聖女問曰。我今云何得到。

地持經卷上  
獄所無毒。答曰：若非威神，卽須業力。非此二事，終不能到。聖女又問：此水何緣而乃湧沸？多諸罪人，及以惡獸。無毒答曰：此是南閻浮提，造惡眾生，新死之者，經四十九日後，無人繼嗣，爲作功德，救拔苦難。生時又無善因，當據本業，所感地獄。自然先渡此海。去此海東十萬由旬，又有一海，其苦倍此。彼海之東，又有一海，其苦復倍。三業惡因之所招感，共號

業海。其處是也。聖女又問鬼王無毒曰：地獄何在？無毒答曰：三海之內，是大地獄。其數百千，各各差別。所謂大者，具有十八；次有五百。苦毒無量。次有千百，亦無量苦。聖女又問大鬼王曰：我母死來未久，不知魂神生至何趣？鬼王復問聖女：聖女之母，在生之日，習何行業？聖女答曰：我母邪見，譏毀三寶，設使暫信，旋又不敬。死雖日淺，未知生在何處。無毒問

地持經卷上  
一  
曰。聖女之母。姓氏何等。聖女答曰。我父。我母。俱婆羅門種。父號尸羅善見。母號悅帝利。無毒合掌。啟聖女曰。願聖女卻返本處。無至憂憶悲戀。悅帝利罪女。生天以來。經今三日。云承孝順之子。爲母修福。布施供養。覺華定自在。王如來塔寺。非惟菩薩之母。得脫地獄。應是無間罪人。此日悉得受樂。俱同生訖。鬼王言畢。合掌而退。婆羅門女。尋如夢歸。悟此事。

已便於覺華定自在。王如來塔像之前。立宏誓願。願我盡未來劫。應有罪苦眾生。廣設方便。使令解脫。佛告文殊師利。時鬼王無毒者。當今財首菩薩。是婆羅門女者。卽地藏菩薩是。

分身集會品第二

爾時百千萬億不可思不可議不可量不可說無量阿僧祇世界所有地獄分身地藏菩

地持經卷一  
三  
薩俱來集在忉利天宮。以如來神力故。各以方面。諸得解脫。從業道出者。各有千萬億那由他數。共持香花來供養佛。彼諸同來等輩。皆因地藏菩薩教化。永不退轉。阿耨多羅三藐三菩提。是諸眾等。久遠劫來。流浪生死。六道受苦。暫無休息。以地藏菩薩廣大慈悲。深誓願故。各獲果證。既至忉利。心懷踊躍。瞻仰如來。目不暫捨。爾時世尊。舒金色臂。摩百千

萬億。不可思。不可議。不可量。不可說。無量阿僧祇世界。諸分身地藏菩薩摩訶薩。頂而作是言。吾於五濁惡世。教化如是剛強眾生。令心調伏。捨邪歸正。十有一二。尚惡習在。吾亦分身百千萬億。廣設方便。或有利根。聞即信受。或有善果。勤勸成就。或有暗鈍。久化方歸。或有業重。不生敬仰。如是等輩眾生。各各差別。分身度脫。或現男子身。或現女人身。或現

天龍身。或現鬼神身。或現山林川源河池泉井。利及於人。悉皆解脫。或現天帝身。或現梵王身。或現轉輪王身。或現居士身。或現國王身。或現宰輔身。或現官屬身。或現比丘比丘尼。優婆塞。優婆夷身。乃至聲聞羅漢辟支佛菩薩等身。而以化度。非但佛身。獨現其前。汝觀吾累劫勤苦度脫。如是難化剛強罪苦眾生。其有未調伏者。隨業報應。若墮惡趣。受大

苦時。汝當憶念。吾在忉利天宮。慇懃付囑於汝。令娑婆世界。至彌勒出世已來。眾生悉使解脫。永離諸苦。遇佛授記。爾時諸世界中。化身地藏菩薩。共復一形。涕淚哀戀。白其佛言。我從久遠劫來。蒙佛接引。使獲不可思議神力。具大智慧。我所分身。徧滿百千萬億恆河沙世界。每一世界。化百千萬億身。每一身。度百千萬億人。令歸敬三寶。永離生死。至涅槃

樂。但於佛法中。所爲善事。一毛一滴。一沙一塵。或毫髮許。我漸度脫。使獲大利。惟願世尊。不以後世惡業。眾生爲慮。如是三白佛言。惟願世尊。不以後世惡業。眾生爲慮。爾時佛讚地藏菩薩言。善哉善哉。吾助汝喜。汝能成就久遠劫來。發宏誓願。廣度將畢。卽證菩提。

觀眾生業緣品第三

爾時佛母摩耶夫人。恭敬合掌。問地藏菩薩言。聖者。閻浮眾生。造業差別。所受報應。其事云何。地藏答言。無量世界。乃及國土。或有地獄。或無地獄。或有女人。或無女人。或有佛法。或無佛法。乃至聲聞。辟支佛。亦復如是。非但地獄。罪報一等。摩耶夫人。重白菩薩。且願聞於閻浮罪報。所感惡趣。地藏答言。聖母。惟願聽受。我粗說之。佛母白言。願聖者說。爾時地藏菩薩。白聖母言。南閻浮提。罪報名號。如是。



若有眾生不孝父母。或至殺害。當墮無間地獄。千萬億劫。求出無期。若有眾生。出佛身血。毀謗三寶。不敬尊經。亦當墮於無間地獄。千萬億劫。求出無期。若有眾生。侵損常住。玷污僧尼。或伽藍內。恣行姪慾。或殺或害。如是等輩。當墮無間地獄。千萬億劫。求出無期。若有眾生。僞作沙門。心非沙門。破用常住。欺誑白衣。違背戒律。種種造惡。如是等輩。當墮無間

地獄。千萬億劫。求出無期。若有眾生。偷竊常住財物。穀米。飲食。衣服。乃至一物。不與取者。當墮無間地獄。千萬億劫。求出無期。地藏白言。聖母。若有眾生。作如是罪。當墮五無間地獄。求暫停苦。一念不得。摩耶夫人。重白地藏菩薩言。云何名爲無間地獄。地藏白言。聖母。諸有地獄。在大鐵圍山之內。其大地獄。有一十八所。次有五百名號。各別。次有千百名字。

亦別無間獄者。其獄之城周匝八萬餘里。其城純鐵。高一萬里。城上火聚。少有空缺。其獄城中諸獄相連。名號各別。獨有一獄。名曰無間。其獄之牆周匝萬八千里。獄牆高一千里。悉是鐵圍。上火徹下。下火徹上。鐵蛇鐵狗吐火。馳逐獄牆之上。東西而走。獄中有牀。縱廣萬里。一人受罪。自見其身。徧臥滿牀。千萬人受。亦各自見。身滿牀上。眾罪業感。獲報如是。

又諸罪人。備受眾苦。百千夜叉。及以惡鬼。口牙如劍。眼如電光。手復銅爪。音業拖拽罪人。復有夜叉。執大鐵戟。中罪人身。或中口鼻。或中腹背。拋空翻接。或置牀上。復有鐵鷹。音淡啗罪人眼。復有鐵蛇。繳罪人頸。鐵釘釘體。拔舌耕犁。抽腸剉斬。洋銅灌口。熱鐵纏身。萬死萬生。業感如是。動經億劫。求出無期。此界壞時。寄生他界。他界次壞。轉寄他方。他方壞時。展轉相寄。

地雍經卷一  
此界成後。還復而來。無間罪報。其事如是。又五事業感。故稱無間。何等爲五。一者。日夜受罪。以至劫數。無時斷絕。故稱無間。二者。一人亦滿。多人亦滿。故稱無間。三者。罪器。叉棒。鷹蛇。狼犬。碓磨。鋸鑿。剉斫。鑊湯。鐵網。鐵繩。鐵驢。鐵馬。生革。絡首。熱鐵。澆身。饑吞鐵丸。渴飲鐵汁。從年竟劫。數劫由他。苦楚相連。更無斷絕。故稱無間。四者。不問男子女人。羌胡夷狄。老

幼貴賤。或龍。或神。或天。或鬼。罪行業感。悉同受之。故稱無間。五者。若墮此獄。從初入時。至百千劫。一日一夜。萬死萬生。求一念間。暫住不得。除非業盡。方得受生。以此連綿。故稱無間。地藏菩薩白聖母言。無間地獄。略說如是。若使廣說。地獄罪器等名。及諸苦事。一劫之中。求說不盡。摩耶夫人聞是語已。憂愁悲泣。頂禮而退。

閻浮眾生業感品第四

爾時地藏菩薩摩訶薩。白佛言。世尊。我今承佛如來威神力故。徧百千萬億世界。分是身形。救拔一切業報眾生。若非如來大慈悲力。卽不能作如是變化。我今又蒙佛付囑。至阿逸多成佛已來。六道眾生。皆令度脫。唯然世尊。願不有慮。爾時佛告地藏菩薩。一切眾生。未解脫者。性識無定。惡習結業。善習結果。爲

善爲惡。逐境而生。輪轉五道。暫無休息。動經塵劫。迷惑障難。如魚遊網。將是長流。脫或暫出。又復遭網。以是等輩。吾當憂念。汝旣畢是往願。累劫重誓。廣度罪輩。吾復何慮。說是語時。會中有一菩薩摩訶薩。名定自在王。白佛言。世尊。地藏菩薩累劫已來。各發何願。今蒙世尊。慇懃讚歎。唯願世尊。略而說之。爾時世尊。告定自在王菩薩言。諦聽。諦聽。善思念之。

地持經卷一  
十六  
吾當爲汝分別解說。乃往過去無量阿僧祇那由他不可說劫。爾時有佛號一切智成就如來。應供。正徧知。明行足。善逝。世間解。無上士。調御丈夫。天人師。佛世尊。其佛壽命六萬劫。未出家時。爲小國王。與一鄰國王爲友。同行十善。饒益眾生。其鄰國王國內人民多造眾惡。二王議計。此眾可愍。廣設方便。而救護之。一王發願。早成佛道。當度是輩。令使無餘。

一王發願。若不先度罪苦眾生。令其安樂。及至菩提。我終未願。先成佛道。佛告。定自在王菩薩。一王發願。早成佛者。卽一切智成就如來。是一王發願。永度罪苦眾生。未願成佛者。卽地藏菩薩是。復於過去無量阿僧祇劫。有佛出世。名清淨蓮華目如來。其佛壽命四十劫。像法之中。有一羅漢。福度眾生。因次教化。遇一女人。字曰光目。設食供養。羅漢問之。欲

願何等。光目答言。我以母亡之日。資福救拔。未知我母死生何趣。羅漢愍之。爲入定觀。見是光目之母。墮在惡趣。受大苦惱。羅漢問光目言。汝母在生。作何行業。今在惡趣。受極大苦。光目聞語。含悲答言。我母所習。唯好食噉。魚鱉之屬。所食魚鱉。多食其子。或炒。或煮。恣情食噉。計其命數。千萬復倍。尊者慈愍。如何哀救。羅漢愍之。爲作方便。勸光目言。汝可志

誠念清淨蓮華目如來。塑畫形像。存亡獲報。光目聞已。卽捨所愛。尋畫佛像。而供養之。加復恭敬。悲泣瞻禮。忽於後夜。夢見佛身。金色晃耀。如須彌山。放大光明。而告光目。汝母不久。當生汝家。纔覺饑寒。卽當言說。其後家內婢生一子。未滿三日。而忽言說。悲泣合掌。告於光目。生死業緣。果報自受。吾是汝母。久處暗冥。自別汝來。累墮地獄。蒙汝福力。方得受

生爲下賤人。又復短命。壽年十三。更落惡道。汝有何計。令吾脫免。光目聞已。知母無疑。哽咽悲啼。而白婢子。既是我母。合知本罪。作何行業。墮於惡道。婢子答言。以殺害毀罵二業。受報如是。若非汝福。救拔吾難。以是業故。未合解脫。光目問言。地獄罪報。其事云何。婢子答言。罪苦之事。不忍稱說。百千歲中。卒說難竟。光目聞已。雨淚號泣。而白空界。願我之母。

永脫地獄。畢十三歲。更無重罪。及歷惡道。十方諸佛。慈哀愍我。聽我爲母。所發廣大誓願。若得我母。永離三途。及斯下賤。乃至女人。永劫不受者。願我今日。對清淨蓮華。目如來像前。卻後百千萬億劫中。應有世界。所有地獄。畜及諸惡道。罪苦眾生。誓願救拔。令離地獄。畜生。餓鬼等趣。如是罪報等人。盡成佛竟。我則然後。方成正覺。發誓願已。具聞清淨蓮華。目

如來而告之曰。光目。汝大慈愍。善能爲母。發  
是大願。吾觀汝母。十三歲畢。捨此報已。生爲  
梵志。壽年百歲。過是報後。當生無憂國土。壽  
命不可計劫。後成佛果。廣度人天。其數無量。  
佛告定自在王。爾時羅漢。福度光目者。卽無  
盡意菩薩。是光目母者。卽解脫菩薩。是光目  
女者。卽地藏菩薩。是也。過去久遠劫中。如是  
慈愍。發恆河沙願。廣度眾生。未來世中。若有

男子女人。好行眾惡者。乃至不信因果者。邪  
淫妄語者。兩舌惡口者。毀謗大乘者。如是諸  
業眾生。必墮惡趣。若遇善知識。勸令一彈指  
間。歸依地藏菩薩。是諸眾生。卽得解脫。三惡  
道報。若能志心歸敬。供養瞻禮。讚歎香華衣  
服。種種珍寶。飲食。如是奉事者。未來百千萬  
億劫中。常在諸天。受勝妙樂。若天福盡。下生  
人間。猶百千劫。常爲帝王。能憶宿命因果本



末定自在王。是地藏菩薩。有如此不可思議  
大威神力。廣利眾生。汝等諸菩薩。當記是經  
廣宣流布。定自在王。白佛言。世尊。願不有慮。  
我等千萬億菩薩摩訶薩。必能承佛威神。廣  
演是經。於閻浮提。利益眾生。定自在王。白世  
尊。已。合掌恭敬。作禮而退。爾時四方天王。俱  
從座起。合掌恭敬。而白佛言。世尊。地藏菩薩。  
於久遠劫來。發如是大願。云何至今。猶度未

絕。更發廣大誓言。救度眾生。唯願世尊。爲我  
等說。佛告四大天王。善哉善哉。吾今爲汝。及  
未來現在。天人眾等。廣利益故。說地藏菩薩  
於娑婆世界。閻浮提內。生死道中。慈哀救拔  
度脫一切罪苦眾生。方便之事。四天王言。唯  
然世尊。願樂欲聞。佛告四大天王。地藏菩薩。  
久遠劫來。迄至于今。度脫眾生。猶未畢願。慈  
愍此世罪苦眾生。復觀未來無量劫中。因蔓

不斷以是之故。又發重願。如是菩薩。於娑婆世界。閻浮提中。百千方便。而為救化。四大天王。地藏菩薩。若遇殺生者。說宿殃短命報。若遇竊盜者。說貧窮困苦報。若遇邪淫者。說雀鴿鴛鴦報。若遇惡口者。說眷屬鬪爭報。若遇毀謗者。說無舌瘡口報。若遇瞋恚者。說醜陋癱殘報。若遇慳吝者。說所求違願報。若遇飲食無度者。說饑渴咽病報。若遇<sub>音音</sub>畋獵恣情者。

說驚狂喪命報。若遇<sub>音音</sub>悖逆父母者。說天地災殺報。若遇焚燒山林者。說狂迷取死報。若遇前後父母惡毒者。說返生鞭撻現受報。若遇網捕生雛者。說骨肉分離報。若遇毀謗三寶者。說盲聾瘖瘂報。若遇輕法慢教者。說永處惡道報。若遇破用常住者。說億劫輪迴地獄報。若遇污梵誣僧者。說永墮畜生報。若遇湯火斬斫傷生者。說輪迴遞償報。若遇破戒犯

地持經卷一  
齋者說禽獸饑餓報。若遇非理毀用者說所求闕絕報。若遇我慢貢高者說僕使下賤報。若遇兩舌鬪亂者說無舌百舌報。若遇邪見者說邊地受生報。至若閻浮提眾生身口意業惡習結果百千報應不可稱計。今且略說如是眾生業感差別。地藏菩薩設諸方便而教化之。是諸眾生若不知過者先受如是等報。後墮地獄動經劫數。未有出期。是故汝等

護人護國。無令是諸眾業迷惑眾生。四大天王聞是語已。涕淚悲歎。合掌而退。

七佛滅罪真言 三遍

離婆離婆帝。求訶求訶帝。陀羅尼帝。尼訶囉帝。毗黎你帝。摩訶伽帝。真陵乾帝。莎婆訶。

讚

如來慈愍。轉大法輪。婆羅門女救慈親。覺華度迷津。摩耶夫人。請問地藏因。

南無常住十方佛

三稱

地藏菩薩本願經卷上

終

地藏菩薩本願經卷中

唐于闐國三藏沙門實叉難陀譯

地獄名號品第五

爾時普賢菩薩摩訶薩。白地藏菩薩言。仁者。願為天龍八部。及未來現在一切眾生。說娑婆世界。及閻浮提。罪苦眾生所受報處。地獄名號。及惡報等事。使未來世末法眾生。知是果報。改往修來。地藏菩薩答言。仁者。我今承

佛威神及大士力略說地獄名號及罪報之事。仁者。閻浮提東方有山。號曰鐵圍。其山黑邃。音粹無日月光。有大地獄。號極無間。又有地獄名大阿鼻。復有地獄名曰四角。復有地獄名曰飛刀。復有地獄名曰火箭。復有地獄名曰夾山。復有地獄名曰通槍。復有地獄名曰鐵車。復有地獄名曰鐵牀。復有地獄名曰鐵牛。復有地獄名曰鐵衣。復有地獄名曰千刃。復

有地獄名曰鐵驢。復有地獄名曰洋銅。復有地獄名曰抱柱。復有地獄名曰流火。復有地獄名曰耕舌。復有地獄名曰剗首。音控復有地獄名曰燒腳。復有地獄名曰啗眼。音淡復有地獄名曰鐵丸。復有地獄名曰諍論。復有地獄名曰鐵鈇。復有地獄名曰多瞋。地藏菩薩言。仁者。鐵圍之內。有如是等地獄。其數無量。更有叫喚地獄。拔舌地獄。糞尿地獄。銅鎖地獄。火象

地獄。火狗地獄。火馬地獄。火牛地獄。火山地獄。火石地獄。火牀地獄。火梁地獄。火鷹地獄。鋸牙地獄。剝皮地獄。飲血地獄。燒手地獄。燒腳地獄。倒刺地獄。火屋地獄。鐵屋地獄。火狼地獄。如是等地獄。其中各各復有諸小地獄。或一或二。或三或四。乃至百千。其中名號各各不同。地藏菩薩告普賢菩薩言。仁者。此皆南閻浮提。行惡眾生。業感如是。業力甚大。能

敵須彌。能深巨海。能障聖道。是故眾生莫輕小惡。以爲無罪。死後有報。纖毫受之。父子至親。岐路各別。縱然相會。無由代受。我今承佛威力。略說地獄罪報之事。唯願仁者。暫聽是言。普賢菩薩答言。吾雖久知三惡道報。望仁者說。令後世末法。一切惡行眾生。聞仁者說。使知歸向佛法。地藏菩薩白言。仁者。地獄罪報。其事如是。或有地獄。取罪人舌。使牛耕之。

或有地獄。取罪人心。夜叉食之。或有地獄。鑊湯盛沸。煮罪人身。或有地獄。赤燒銅柱。使罪人抱。或有地獄。飛猛火聚。趁及罪人。或有地獄。一向寒冰。或有地獄。無限糞尿。或有地獄。飛鐵蒺藜。或有地獄。多攢音全火鎗。或有地獄。唯撞胸背。或有地獄。但燒手足。或有地獄。盤繳鐵蛇。或有地獄。驅逐鐵狗。或有地獄。並駕鐵騾。仁者如是等報。各各獄中。有百千種業道。

之器。無非是銅。是鐵。是石。是火。此四種物。眾業行感。若我廣說地獄罪報等事。一一獄中。卽有百千種苦。何況多獄。我今承佛威神。及仁者問。略說如是。若廣解說。窮劫不盡。

如來讚歎品第六

爾時世尊。舉身放大光明。徧照百千萬億恆河沙等諸佛世界。出大音聲。普告諸佛世界一切諸菩薩摩訶薩。及天龍鬼神人非人等。

地持經卷中  
四  
聽吾今日稱揚讚歎地藏菩薩摩訶薩於十方世界現大不可思議威神慈悲之力救護一切罪苦之事吾滅度後汝等諸菩薩大士及天龍鬼神等廣作方便衛護是經令一切眾生離一切苦證涅槃樂說是語已會中有一菩薩名曰普廣合掌恭敬而白佛言今見世尊讚歎地藏菩薩有如是不可思議大威神德惟願世尊爲未來世末法眾生宣說地

藏菩薩利益人天因果等事使諸天龍八部及未來世眾生頂受佛語爾時世尊告普廣菩薩及四眾等諦聽諦聽吾當爲汝略說地藏菩薩利益人天福德之事普廣白言唯然世尊願樂欲聞佛告普廣菩薩未來世中若有善男子善女人聞是地藏菩薩摩訶薩名者或合掌者讚歎者作禮者戀慕者是人超越三十劫罪普廣若有善男子善女人或彩



畫形像。或土石膠漆。金銀銅鐵。作此菩薩。一瞻禮者。是人百返生於三十三天。永不墮於惡道。假如天福盡。故下生人間。猶爲國王。不失大利。若有女人。厭女人身。盡心供養地藏菩薩畫像。及土石膠漆銅鐵等形。如是日日不退。常以華香。飲食。衣服。繒綵。幢幡。錢寶等。一物供養。是善女人。盡此一報女身。百千萬劫。更不生有女人世界。何況復受女身。除非

慈願力。故要受女身。度脫眾生者。承斯供養地藏菩薩之力。及功德力。故百千萬劫。更不復受女人之身。復次。普廣菩薩。若有女人。厭於醜陋。多疾病者。但於地藏菩薩像前。至心瞻禮。食頃之間。是人千萬劫中。所受生身。相貌圓滿。無諸疾病。是醜陋女。如不厭是女身。百千萬億生中。常爲王女。乃及王妃。宰輔大姓。大長者女。端正受生。諸相圓滿。由至心故。

瞻禮地藏菩薩獲福如是。復次普廣。若有善男子善女人。能對地藏菩薩像前。作諸伎樂歌詠讚歎香花供養。乃至勸於一人多人。如是等輩。現在世中。及未來世。常得百千鬼神。日夜衛護。不令惡事。輒聞於耳。何況親受諸橫。復次普廣菩薩。未來世中。若有惡人。及惡神惡鬼。見有善男子善女人。歸敬供養讚歎瞻禮地藏菩薩形像。或妄生譏毀謗無功德。

及利益事。或露齒笑。或背面非。或勸人共非。或一人非。或多人非。乃至一念生譏毀者。如是之人。至賢劫千佛滅度之後。譏毀罪報。尙在阿鼻地獄。受極重苦。過是劫已。方受餓鬼。又經千劫。復受畜生。又經千劫。方得人身。縱得人身。貧窮下賤。諸根不具。多被惡業來結。其心。不久之間。復墮惡道。是故普廣譏毀他人供養。尙獲此報。何況別生惡見毀滅。復次

普廣菩薩。若未來世。有男子女人。久處牀枕。求生求死了不可得。或夜夢惡鬼。乃及家親。或遊險道。或多魘魅。共鬼神遊。日月歲深。轉復<sup>音注音債</sup>疴瘵。眠中叫喚。慘悽不樂者。此是業道論對。未定輕重。或難捨壽。或不痊愈。男女俗眼。不辯是事。但當對諸佛菩薩像前。高聲轉讀此經一遍。或取病人可愛之物。或衣服寶貝。莊園舍宅。對病人前。高聲唱言。我某甲等。為

是病人。對經像前。捨諸愛物。或供養。或造佛菩薩形像。或造塔寺。或然油燈。或施常住。如是三白病人。遣令聞知。假使諸識分散。至氣盡者。一日。二日。三日。至七日已來。但高聲白事。高聲讀經。是人命終之後。宿殃重罪。至於五無間罪。永得解脫。所受生處。常知宿命。何況善男子。善女人。自書此經。或教人書。或自塑畫菩薩形像。乃至教人塑畫。所受果報。必

女廣經卷中  
獲大利。是故普廣。若見有人。讀誦是經。乃至  
一念讚歎。是經。或恭敬。是經者。汝須百千方  
便。勸是等人。勤心莫退。能得未來現在。百千  
萬億不可思議功德。復次普廣菩薩。若未來  
世。諸眾生等。或夢。或寐。見諸鬼神。乃及諸形。  
或悲。或啼。或愁。或歎。或恐。或怖。此是一生十  
生。百生千生。過去父母。男女弟妹。夫妻眷屬。  
在於惡趣。未得出離。希望福力。救拔苦惱。當

告宿世骨肉。使作方便。願離惡道。普廣。汝以  
神力。遣是眷屬。令對諸佛菩薩像前。志心自  
讀此經。或請人讀。其數三遍。或至七遍。如是  
惡道眷屬。經聲畢。是遍數。當得解脫。乃至夢  
寐之中。永不復見。復次普廣。若未來世。有諸  
下賤等人。或奴。或婢。乃至諸不自由之人。覺  
知宿業。要懺悔者。志心瞻禮。地藏菩薩形像。  
乃至一七日中。念菩薩名。可滿萬遍。如是人

等盡此報後。千萬生中。常生尊貴。更不經歷  
三惡道苦。復次普廣。若未來世。閻浮提內。刹  
利婆羅門。長者居士。一切人等。及異姓種族。  
有新產生者。或男或女。七日之中。早與讀誦  
此不思議經典。更爲念菩薩名號。可滿萬遍。  
是新生子。或男或女。宿有殃報。使得消滅。安  
樂易養。壽命增長。若是承福生者。轉增安樂  
及與壽命。復次普廣。未來世中。於月一日。八

日。十四。十五。十八日。二十三。二十四。二十八  
日。二十九。三十日。如是諸日。結定眾生罪業。  
多少輕重。南閻浮提眾生。舉步動念。無不是  
業。無不是罪。何況恣情殺害。竊盜邪淫。妄語  
百千罪狀者。若能於是十齋之日。對佛菩薩  
及諸賢聖像前。轉讀是經一遍。東西南北。百  
由旬內。無諸災難。當此居家。若長若幼。現在  
未來。百千歲中。永離惡趣。於十齋日。每轉一

地持經卷中  
遍現世令此居家無諸橫病。衣食豐溢。是故  
普廣當知地藏菩薩。有如是等不可說百千  
萬億大威神力。利益之事。閻浮眾生。於此大  
士。有大因緣。是諸眾生聞菩薩名。見菩薩像。  
乃至聞是經三字五字。一偈一句者。現在殊  
妙安樂。未來之世。百千萬生。常得端正。生尊  
貴家。爾時普廣菩薩。聞佛如來。稱揚讚歎。地  
藏菩薩。已胡跪合掌。復白佛言。世尊。我久知

是大士。有如此不可思議神力。及大誓願力。  
爲未來眾生。遣知利益。故問如來。唯然頂受。  
世尊。當何名此經。使我云何流布。佛告普廣。  
此經凡有三名。一名地藏本願。亦名地藏本  
行。亦名地藏本誓力經。緣此菩薩。久遠劫來。  
發大重願。利益眾生。是故汝等。依願流布。普  
廣菩薩。聞已信受。作禮而退。

利益存亡品第七

地持經卷中  
爾時地藏菩薩摩訶薩。白佛言。世尊。我觀是  
閻浮眾生。舉足動念。無非是罪。若於善利多  
退初心。若遇惡緣。念念增長。是等輩人。如履  
泥塗。負於重石。漸困漸重。足步深陷。若得遇  
善知識。替與減負。或全與負。是善知識。有大  
力故。復相扶助。勸令牢腳。若達平地。須省惡  
路。無再經歷。世尊。習惡眾生。從纖毫間。便至  
無量。是諸眾生。有如此習。臨命終時。男女眷

屬。宜爲設福。以資前路。或懸幡蓋。及然油燈。  
或轉讀尊經。或供養佛像。及諸聖像。乃至念  
佛。菩薩。辟支佛。一名一號。臨終之人。一歷耳  
根。或聞本識。是諸眾生。所造惡業。計其感果。  
必墮惡趣。緣是眷屬。爲其臨終之人。修此聖  
因。如是眾罪。悉皆消滅。若能更爲身死之後。  
七七日內。廣造眾善。能使是諸眾生。永離惡  
趣。得生人天。受勝妙樂。現在眷屬。利益無量。

地持經卷中  
是故我今對佛世尊及天龍八部人非人等  
勸於閻浮提眾生臨終之日慎勿殺害及造  
惡緣拜祭鬼神求諸魍魎何以故是所殺害  
乃至拜祭無纖毫之力利益亡人但結罪緣  
轉增深重假使來世或現在生得獲聖分生  
人天中緣是臨終被眷屬造是惡因亦令是  
命終人殃累對辯晚生善處何況臨命終人  
在生未曾有少善根各據本業自受惡趣何

忍眷屬更爲增業譬如有人從遠地來絕糧  
三日所負擔物彊過百斤忽遇鄰人更附少  
物以是之故轉復困重世尊我觀閻浮眾生  
但能於諸佛教乃至善事一毛一滴一沙一  
塵如是利益悉皆自得說是語時會中有一  
長者名曰大辯是長者久證無生化度十方  
現長者身合掌恭敬問地藏菩薩言大士是  
南閻浮提命終之後小大眷屬爲修功德乃



至設齋造眾善因。是命終人。得大利益。及解脫。不。地藏菩薩答言。長者。我今爲未來現在一切眾生。承佛威力。略說是事。長者。未來現在。諸眾生等。臨命終日。得聞一佛名。一菩薩名。一辟支佛名。不問有罪無罪。悉得解脫。若有男子女人。在生不修善因。多造眾罪。命終之後。眷屬小大。爲造福利。一切聖事。七分之中。而乃獲一。六分功德。生者自受。以是之故。

未來現在善男女等。及健自修。十分全獲。無常大鬼。不期而到。冥冥遊神。未知罪福。七七日內。如癡如聾。或在諸司。辯論業果。審定之後。據業受生。未測之間。千萬愁苦。何況墮於諸惡趣等。是命終人。未得受生。七七日內。念念之間。望諸骨肉眷屬。與造福力救拔。過是日後。隨業受報。若是罪人。動經千百歲中。無解脫日。若是五無間罪。墮大地獄。千劫萬劫。

地持經卷中  
永受眾苦。復次長者。如是罪業眾生。命終之後。眷屬骨肉。爲修齋福。資助業道。未齋食。竟及營齋次。米泔菜葉。不棄於地。乃至諸食。未獻佛僧。勿得先食。如有違食。及不精勤。是命終人。了不得力。若能精勤護淨。奉獻佛僧。是命終人。七分獲一。是故長者。閻浮眾生。若能爲其父母。及眷屬等。命終之後。設齋供養。志心勤懇。如是之人。存亡獲利。說是語時。忉利

天宮。有千萬億那由他。閻浮鬼神。悉發無上菩提之心。大辯長者。歡喜奉教。作禮而退。

閻羅王眾讚歎品第八

爾時鐵圍山內。有無量鬼王。與閻羅天子。俱詣忉利。來到佛所。所謂惡毒鬼王。多惡鬼王。大諍鬼王。白虎鬼王。血虎鬼王。赤虎鬼王。散殃鬼王。飛身鬼王。電光鬼王。狼牙鬼王。千眼鬼王。噉獸鬼王。負石鬼王。主耗鬼王。主禍鬼

地持經卷中  
王。主食鬼王。主財鬼王。主畜鬼王。主禽鬼王。  
主獸鬼王。主魅鬼王。主產鬼王。主命鬼王。主  
疾鬼王。主險鬼王。三目鬼王。四目鬼王。五目  
鬼王。祁利失王。大祁利失王。祁叉王。大祁叉  
王。阿那吒王。大阿那吒王。如是等大鬼王。各  
與百千諸小鬼王。盡居閻浮提。各有所執。各  
有所主。是諸鬼王。與閻羅天子。承佛威神。及  
地藏菩薩摩訶薩力。俱詣忉利。在一面立。爾

時閻羅天子。胡跪合掌。白佛言。世尊。我等今  
者。與諸鬼王。承佛威神。及地藏菩薩摩訶薩  
力。方得詣此忉利大會。亦是我等獲善利故。  
我有疑事。敢問世尊。惟願慈悲。爲我宣說。佛  
告閻羅天子。恣汝所問。吾爲汝說。是時閻羅  
天子。瞻禮世尊。及迴視地藏菩薩。而白佛言。  
世尊。我觀地藏菩薩。在六道中。百千方便。而  
度罪苦眾生。不辭疲倦。是大菩薩。有如是不

地藏經卷中  
可思議神通之事。然諸眾生獲脫罪報。未久之間。又墮惡道。世尊是地藏菩薩。既有如是不思議力。云何眾生而不依止善道。永取解脫。惟願世尊爲我解說。佛告閻羅天子。南閻浮提眾生。其性剛強。難調難伏。是大菩薩於百千劫。頭頭救拔。如是眾生。早令解脫。是罪報人。乃至墮大惡趣。菩薩以方便力。拔出根本業緣。遣悟宿世之事。自是閻浮眾生。結惡

習重。旋出旋入。勞斯菩薩。久經劫數。而作度脫。譬如有人。迷失本家。誤入險道。其險道中。多諸夜叉。虎狼獅子。虺蛇蝮蠍。如是迷人在險道中。須臾之間。卽遭諸毒。有一知識。多解大術。善禁是毒。乃及夜叉。諸惡毒等。忽逢迷人。欲進險道。而語之言。咄哉男子。爲何事故。而入此路。有何異術。能制諸毒。是迷路人。忽聞是語。方知險道。卽便退步。求出此路。是善

知識提攜接手引出險道免諸惡毒。至于好道令得安樂。而語之言。咄哉迷人。自今已後。勿履是道。此路入者。卒難得出。復損性命。是迷路。人亦生感重。臨別之時。知識又言。若見知親及諸路人。若男若女。言於此路。多諸毒惡。喪失性命。無令是眾。自取其死。是故地藏菩薩。具大慈悲。救拔罪苦眾生。欲生天人。令受妙樂。是諸罪眾。知業道苦。由得解脫。永不

再歷。如迷路。人誤入險道。遇善知識。引接令出。永不復入。逢見他人。復勸莫入。自然因是迷故。得出離竟。更不復入。若再履踐。猶尙迷悞。不覺舊曾所落險道。或致失命。如墮惡趣。眾生地。藏菩薩。方便力故。使令解脫。生人天中。旋出再入。若業結重。永處地獄。無解脫時。爾時惡毒鬼王。合掌恭敬。白佛言。世尊。我諸鬼王。其數無量。在閻浮提。或利益人。或損害

人各各不同。然是業報。使我眷屬遊行世界。多惡少善。過人家庭。或城邑聚落。莊園房舍。或有男子女人。修毫髮善事。乃至懸一幡。一蓋。一香。一華。供養佛像。及菩薩像。或轉讀尊經。燒香供養。一句一偈。我等鬼王。敬禮是人。如過去。現在。未來。諸佛。勅諸小鬼。各有大力。及土地分。盡使衛護。不令惡事橫事。惡病橫病。乃至不如意事。近於此舍等處。何況入其

門戶。佛讚鬼王。善哉善哉。汝等及與閻羅大王。能如是擁護善男子。善女人。吾亦令於梵王帝釋。衛護汝等。說是語時。會中有一鬼王。名曰主命。白佛言。世尊。我本業緣。主閻浮人命。生時死時。我皆主之。在我本願。甚欲利益。自是眾生。不會我意。致令生死。俱不得安。何以故。是閻浮提人。初生之時。不問男女。將欲生時。但作善事。增益舍宅。自令土地。無量歡

喜擁護母子。得大安樂。利益眷屬。或已生下。慎勿殺害。取諸鮮味。供給產母。及廣聚眷屬。飲酒食肉。歌樂絃管。能令子母。不得安樂。何以故。是產難時。有無數惡鬼。及魍魎精魅。欲食腥血。是我早令舍宅土地靈祇。荷護子母。使令安樂。而得利益。如是之人。見安樂故。便合設福。答諸土地。翻爲殺害。聚會眷屬。以是之故。犯殃自受。子母俱損。又閻浮提。臨命終

人。不問善惡。我欲令是命終之人。不落惡道。何況自修善根。增我力故。是閻浮提。行善之人。臨命終時。亦有百千惡道鬼神。或變作父母。乃至眷屬。引接亡人。令落惡道。何況本作惡者。世尊。如是閻浮提。男子女人。臨命終時。神識昏昧。不辯善惡。乃至眼耳。更無見聞。是諸眷屬。當須設大供養。轉讀尊經。念佛菩薩名號。如是善緣。能令亡者。離諸惡道。諸魔鬼

地持經卷中  
神悉皆退散。世尊一切眾生。臨命終時。若得聞一佛名。一菩薩名。或大乘經典。一句一偈。我觀如是輩人。除五無間殺害之罪。小小惡業。合墮惡趣者。尋卽解脫。佛告主命鬼王。汝大慈故。能發如是大願。於生死中。護諸眾生。若未來世。男子女人。至生死時。汝莫退是願。總令解脫。永得安樂。鬼王白佛。願不有慮。我畢是形。念念擁護閻浮眾生。於生死時。信受

我語。無不解脫。獲大利益。爾時佛告地藏菩薩。是大鬼王。主壽命者。曾經百千生中。作大鬼王。於生死中。擁護眾生。是大士慈悲願故。現鬼王身。實非鬼也。卻後過一百七十劫。當得成佛。號曰無相如來。劫名安樂。世界名淨住。其佛壽命。不可計劫。地藏是大鬼王。其事如是。不可思議。所度天人。亦不可限量。

稱佛名號品第九



地持經卷中  
爾時地藏菩薩摩訶薩。白佛言。世尊。我今爲  
未來眾生。演利益事。於生死中。得大利益。唯  
願世尊。聽我說之。佛告地藏菩薩。汝今欲興  
慈悲。救拔一切罪苦六道眾生。演不思議事。  
今正是時。唯當速說。吾卽涅槃。使汝早畢。是  
願。吾亦無憂。現在未來。一切眾生。地藏菩薩  
白佛言。世尊。過去無量阿僧祇劫。有佛出世。  
號無邊身如來。若有男子女人。聞是佛名。暫

生恭敬。卽得超越四十劫。生死重罪。何況塑  
畫形像。供養讚歎。其人獲福。無量無邊。又於  
過去恆河沙劫。有佛出世。號寶性如來。若有  
男子女人。聞是佛名。一彈指頃。發心歸依。是  
人於無上道。永不退轉。又於過去。有佛出世。  
號波頭摩勝如來。若有男子女人。聞是佛名。  
歷於耳根。是人當得千返生於六欲天中。何  
况志心稱念。又於過去。不可說不可說阿僧

地持經卷中  
祇劫。有佛出世。號獅子吼如來。若有男子  
人。聞是佛名。一念歸依。是人得遇無量諸佛。  
摩頂受記。又於過去。有佛出世。號拘留孫。若  
有男子。女人。聞是佛名。至心瞻禮。或復讚歎。  
是人於賢劫千佛會中。爲大梵王。得授上記。  
又於過去。有佛出世。號毗婆尸。若有男子。女  
人。聞是佛名。永不墮於惡道。常生人天。受勝  
妙樂。又於過去。無量無數恆河沙劫。有佛出

世。號寶勝如來。若有男子。女人。聞是佛名。畢  
竟不墮惡道。常在天上。受勝妙樂。又於過去。  
有佛出世。號寶相如來。若有男子。女人。聞是  
佛名。生恭敬心。是人不久得阿羅漢果。又於  
過去。無量阿僧祇劫。有佛出世。號袈裟幢如  
來。若有男子。女人。聞是佛名者。超一百大劫  
生死之罪。又於過去。有佛出世。號大通山王  
如來。若有男子。女人。聞是佛名者。是人得遇

恆河沙佛。廣爲說法。必成菩提。又於過去。有淨月佛。山王佛。智勝佛。淨名王佛。智成就佛。無上佛。妙聲佛。滿月佛。月面佛。有如是等。不可說佛。世尊。現在未來。一切眾生。若天若人。若男若女。但念一佛名號。功德無量。何況多名。是眾生等。生時死時。自得大利。不墮惡道。若有臨命終人。家中眷屬。乃至一人。爲是病人。高聲念一佛名。是命終人。除五無間大罪。

餘業報等。悉皆消滅。是五無間大罪。雖至極重。動經億劫。了不得出。承斯臨命終時。他人爲其稱念佛名。於是罪中。亦漸消滅。何況眾生。自稱自念。獲福無量。滅無量罪。

七佛滅罪真言

三遍

離婆離婆帝。求訶求訶帝。陀羅尼帝。尼訶囉帝。毗黎你帝。摩訶伽帝。眞陵乾帝。莎婆訶。

讚

普賢啟問。地藏宏開。三塗六道。絕塵埃。普廣  
問如來。授記十齋。接引上蓮臺。

南無常住十方法 三稱

地藏菩薩本願經卷中 終

地藏菩薩本願經卷下

唐于闐國三藏沙門實叉難陀譯

較量布施功德緣品第十  
爾時地藏菩薩摩訶薩承佛威神從座而起  
胡跪合掌白佛言世尊我觀業道眾生較量  
布施有輕有重有一生受福有十生受福有  
百生千生受大福利者是事云何唯願世尊  
為我說之爾時佛告地藏菩薩吾今於忉利

北齊經卷一  
天宮一切眾會說閻浮提布施較量功德輕重。汝當諦聽。吾爲汝說。地藏菩薩白佛言。我疑是事。願樂欲聞。佛告地藏菩薩。南閻浮提。有諸國王。宰輔大臣。大長者。大利利。大婆羅門等。若遇最下貧窮。乃至癰殘瘡啞。聾癡無目。如是種種。不完具者。是大國王等。欲布施時。若能具大慈悲。下心含笑。親手徧布。或使人施。輒言慰喻。是國王等。所獲福利。如布施

百恆沙佛功德之利。何以故。是國王等。於是最貧賤等。及不完具者。發大慈心。是故福利。有如此報。百千生中。常得七寶具足。何況衣食受用。復次地藏。若未來世。有諸國王。至婆羅門等。遇佛塔寺。或佛形像。乃至菩薩聲聞。辟支佛等像。躬自營辦。供養布施。是國王等。當得三劫。爲帝釋身受勝妙樂。若以布施福利。迴向法界。是大國王等。於十劫中。常爲大

地藏經卷下  
梵天王復次地藏。若未來世有諸國王。至婆羅門等。遇先佛塔廟。或至經像毀壞破落。若能發心。修補嚴飾。是國王等。或自營辦。或勸他人。乃至百千人等。布施結緣。是國王等。百千生中。常爲轉輪王身。如是他人。同布施者。百千生中。常爲小國王身。更能於塔廟前。發迴向心。如是國王。乃至諸人。盡成佛道。以此果報無量無邊。復次地藏。未來世中有諸國

王。及婆羅門等。見諸老病。及生產婦女。若一念間。具大慈心。布施醫藥。飲食臥具。使令安樂。如是福利。不可思議。一百劫中。常爲淨居天主。二百劫中。常爲六欲天主。畢竟成佛。永不墮於惡道。乃至百千生中。耳根不聞苦聲。復次地藏。若未來世有諸國王。及婆羅門等。能作如是布施。獲福無量。更能回向。不問多少。畢竟成佛。何況釋梵轉輪王報。是故地藏。

地持經卷一  
三  
普勸眾生當如是學。迴向法界。復次地藏。未  
來世中。若善男子。善女人。於佛法中。種少善  
根。毛髮沙塵等許。所受福利。不可爲喻。復次  
地藏。未來世中。若有善男子。善女人。遇佛形  
像。菩薩形像。辟支佛像。轉輪王像。布施供養。  
得無量福。常在人天。受勝妙樂。若能回向法  
界。是人福利。不可爲喻。復次地藏。未來世中。  
若有善男子。善女人。遇大乘經典。或聞一句。

一偈。發殷重心。讚歎恭敬。布施供養。是人獲  
大果報。無量無邊。若能回向法界。其福不可  
爲喻。復次地藏。未來世中。有善男子。善女人。  
遇佛塔寺。大乘經典。新者。布施供養。瞻禮讚  
歎。恭敬合掌。若遇故者。或毀壞者。修補營理。  
或獨發心。或勸多人。同共發心。如是等輩。三  
十生中。常爲諸小國王。檀越之人。當爲轉輪  
聖王。還以善法。教化諸小國王。復次地藏。菩

薩。未來世中。若有善男子。善女人。於佛法中。所種善根。或布施。或供養。或修補塔寺。或裝理經典。乃至一毛。一塵。一沙。一滴。如是善事。若能回向。利益法界。是人功德。百千生中。受上妙樂。如但迴向自家眷屬。或利益自身。如是之果。卽三生受樂。捨一得萬報。是故地藏。布施因緣。其事如是。

地神護法品第十一

爾時堅牢地神。白佛言。世尊。我從昔來。瞻視頂禮。無量菩薩摩訶薩。皆是大不思議神通智慧。廣度眾生。是地藏菩薩摩訶薩。於諸菩薩。誓願深重。世尊。是地藏菩薩。於閻浮提。有大因緣。如文殊。普賢。觀音。彌勒。示化百千身形。度於六道。其願尙有畢竟。是地藏菩薩。教化六道。一切眾生。所發誓願。劫數如千百億恆河沙。世尊。我觀未來世中。及現在眾生。於



所住處南方清潔之地。以土石竹木作其龕室。是人若能塑畫乃至金銀銅鐵作地藏形。燒香供養。瞻禮讚歎。是人居處即得十種利益。何等爲十。一者土地豐穰。二者家宅安昌。三者先亡生天。四者見存益壽。五者所求遂意。六者無水火災。七者虛耗辟除。八者杜絕惡夢。九者出入神護。十者多遇聖因。世尊。未來世中及現在眾生若能於所住處方面作

如是供養得如是利益。復白佛言。世尊。未來世中若有善男子善女人。於所住處有此經典。及菩薩像。是人更能轉讀經典。供養菩薩。我常日夜以本神力衛護是人。乃至水火賊盜。大橫小橫。一切惡事悉皆消滅。無有遺餘。佛告堅牢地神。汝大神力。諸神少及。何以故。閻浮土地。悉蒙汝護。乃至草木沙石稻蔬竹葦穀米寶貝。從地而有。皆因汝力。又當稱揚

地藏菩薩利益之事。汝之功德。及以神通。百千倍於常分地神。若未來世。有善男子。善女人。供養地藏菩薩。及轉讀是經。但依地藏菩薩本願經。一事修行者。汝以本力。而擁護之。勿令一切災害。及不如意事。輒聞於耳。何況令受。非但汝獨擁護是人。亦有釋梵眷屬。四王眷屬。諸天眷屬。擁護是人。何故得如是。聖賢擁護。皆由瞻禮地藏菩薩形像。及轉讀是

本願經故。自然畢竟出離苦海。證涅槃樂。以是之故。得大擁護。

見聞利益品第十二

爾時世尊。從頂門上。放百千萬億大毫相光。所謂白毫相光。大白毫相光。瑞毫相光。大瑞毫相光。玉毫相光。大玉毫相光。紫毫相光。大紫毫相光。青毫相光。大青毫相光。碧毫相光。大碧毫相光。紅毫相光。大紅毫相光。綠毫相

地持經卷下  
光。大綠毫相光。金毫相光。大金毫相光。慶雲  
毫光。大慶雲毫光。千輪毫光。大千輪毫光。寶  
輪毫光。大寶輪毫光。日輪毫光。大日輪毫光。  
月輪毫光。大月輪毫光。宮殿毫光。大宮殿毫  
光。海雲毫光。大海雲毫光。放如是等毫相光  
已。出微妙音。告諸大眾。天龍八部人非人等。  
聽吾今日於忉利天宮。稱揚讚歎地藏菩薩。  
於天人中。利益等事。不思議事。超聖因事。證

十地事。畢竟不退。阿耨多羅三藐三菩提事。  
說是語時。會中有一菩薩摩訶薩。名觀世音。  
從座而起。胡跪合掌。白佛言。世尊。是地藏菩  
薩。具大慈悲。憐念罪苦眾生。於千萬億世界。  
化千萬億身。所有功德。及不思議威神之力。  
我聞世尊與十方無量諸佛。異口同音。讚歎  
地藏菩薩言。使過去現在未來諸佛。說其功  
德。猶不能盡。向者又蒙世尊普告大眾。欲稱

地持經卷一  
揚地藏菩薩利益等事。唯願世尊。爲現在未來一切眾生。稱揚地藏菩薩不思議事。令天龍八部。瞻禮獲福。佛告觀世音菩薩。汝於娑婆世界。有大因緣。若天若龍。若男若女。若神若鬼。乃至六道罪苦眾生。聞汝名者。見汝形者。戀慕汝者。讚歎汝者。是諸眾等於無上道。必不退轉。常生人天。具受妙樂。因果將熟。遇佛受記。汝今具大慈悲。憐愍眾生。及天龍八

部。吾欲宣說地藏菩薩不可思議利益之事。汝當諦聽。吾今說之。觀世音菩薩言。唯然世尊。願樂欲聞。佛告觀世音菩薩。未來現在諸世界中。有諸天人。受天福盡。五衰相現。或有墮於惡道之者。如是天人。若男若女。當現相時。或見地藏菩薩形像。或聞地藏菩薩名字。一瞻一禮。是諸天人。轉增天福。受大快樂。永不歷於三惡道報。何況見聞菩薩。以諸香華。

衣服飲食寶貝瓔珞布施供養所獲功德福  
利無量無邊復次觀世音若未來世現在諸  
世界中六道眾生臨命終時得聞地藏菩薩  
名一聲歷耳根者是諸眾生永不歷於三惡  
道苦何況臨命終時父母眷屬將是命終之  
人舍宅財物寶貝衣服塑畫地藏菩薩形像  
或使病人未終之時眼見耳聞了知眷屬將  
已舍宅寶貝等物爲其自身塑畫地藏菩薩

形像是人若有業報合受重病承斯功德尋  
卽除愈壽命增益此人若是業報命盡應有  
一切罪障業障合墮惡趣受苦承斯功德命  
終之後卽生人天受勝妙樂一切罪障業障  
悉皆消滅復次觀世音若未來世有男子女  
人或乳哺時或三歲五歲十歲已下亡失父  
母乃至兄弟姊妹是人年既長大思憶父母  
及諸眷屬不知落在何趣生何世界生何天

中。是人若能塑畫地藏菩薩形像。乃至聞名。一瞻一禮。從一日。至七日。莫退初心。聞名見形。瞻禮供養。是人眷屬。假因業故。墮惡趣者。計當劫數受苦。承斯男女兄弟姊妹。塑畫地藏菩薩形像。瞻禮功德。尋卽解脫。生人天中。受勝妙樂。是人父母眷屬。如有福力。已生人天。受勝妙樂。承斯功德。轉增聖因。受無量樂。是人更能三七日中。一心瞻禮地藏菩薩形

像。念其名字。滿於萬遍。當得菩薩現無邊身。具告是人。父母眷屬。受生之處。或於夢中。菩薩現大神力。親領是人。於諸世界。見諸父母眷屬。更能每日。念菩薩名千遍。至于千日。是人當得菩薩遣其所在。土地鬼神。終身衛護。現世衣食豐益。無諸疾苦。乃至橫事不入其門。何況及身。是人畢竟。而得菩薩摩頂授記。復次。觀世音。若未來世。有善男子。善女人。欲

發廣大慈心救度一切眾生者。欲修無上菩提者。欲離三界者。如是人等。見地藏菩薩形像。及聞名者。至心歸依。或以香華衣服。寶貝飲食。供養瞻禮。是善男子。善女人。所願速成。永無障礙。復次。觀世音。若未來世。有善男子。善女人。欲求現在未來。百千萬億等願。百千萬億等事。但當歸依。瞻禮。供養。讚歎。地藏菩薩形像。如是所願所求。悉皆成就。復願地藏

菩薩。具大慈悲。長擁護我。是人於睡夢中。即得菩薩摩頂授記。復次。觀世音。若未來世。有善男子。善女人。於大乘經典。深生珍重。發不思議心。欲讀欲誦。縱遇明師。教示令熟。旋讀旋忘。動經年月。了不能誦。是善男子。善女人。有宿業障。未得消除。故於大乘經典。無讀誦性。如是之人。聞地藏菩薩名。見地藏菩薩像。當具本心。恭敬陳白。更以香華。衣服飲食。一

切玩具。供養菩薩。以淨水一盞。經一日一夜。安菩薩像前。然後合掌請服。迴首向南。臨入口時。至心鄭重。服水既畢。慎五辛。酒肉。邪淫。妄語。及諸殺害。一七日。或三七日。是善男子。善女人。於睡夢中。見地藏菩薩。現無邊身。於是人處。授灌頂水。其人夢覺。卽獲聰利。應是經典。一歷耳根。卽當永記。更無忘失。一句一偈。復次。觀世音。若未來世。有諸人等。衣食不

足。求者乖願。或多疾病。或多凶衰。家宅不安。眷屬分散。或諸橫事。多來忤身。睡夢之間。多有驚怖。如是人等。聞地藏菩薩名。見地藏菩薩形。至心恭敬。念滿萬遍。是諸不如意事。漸漸消滅。卽得安樂。衣食豐溢。乃至於睡夢中。悉皆安樂。復次。觀世音。若未來世。有善男子。善女人。或因治生。或因公私。或因生死。或因急事。入山林中。過渡河海。乃及大水。或經險



道是人先當念地藏菩薩名萬遍。所過土地鬼神衛護。行住坐臥。永保安樂。乃至逢於虎狼師子。一切毒害。不能損之。佛告觀世音。是地藏菩薩。於閻浮提。有大因緣。若說於諸眾生。見聞利益等事。百千劫中。說不能盡。是故觀世音。汝以神力。流布是經。令娑婆世界眾生。百千萬劫。永受安樂。爾時世尊。而說偈言。吾觀地藏威神力。恆河沙劫說難盡。

見聞瞻禮一念間	利益人天無量事
若男若女若龍神	報盡應當墮惡道
至心歸依大士身	壽命轉增除罪障
少失父母恩愛者	未知魂神在何趣
兄弟姊妹及諸親	生長以來皆不識
或塑或畫大士身	悲戀瞻禮不暫捨
三七日中念其名	菩薩當現無邊體
示其眷屬所生界	縱墮惡趣尋出離

若能不退是初心 卽獲摩頂受聖記  
欲修無上菩提者 乃至出離三界苦  
是人既發大悲心 先當瞻禮大士像  
一切諸願速成就 永無業障能遮止  
有人發心念經典 欲度羣迷超彼岸  
雖立是願不思議 旋讀旋忘多廢失  
斯人有業障惑故 於大乘經不能記  
供養地藏以香花 衣服飲食諸玩具

以淨水安大士前 一日一夜求服之  
發殷重心慎五辛 酒肉邪淫及妄語  
三七日內勿殺害 至心思念大士名  
卽於夢中見無邊 覺來便得利根耳  
應是經教歷耳聞 千萬生中永不忘  
以是大士不思議 能使斯人獲此慧  
貧窮眾生及疾病 家宅凶衰眷屬離  
睡夢之中悉不安 求者乖違無稱遂

志心瞻禮地藏像 一切惡事皆消滅  
至於夢中盡安樂 衣食豐饒神鬼護  
欲入山林及渡海 毒惡禽獸及惡人  
惡神惡鬼并惡風 一切諸難諸苦惱  
但當瞻禮及供養 地藏菩薩大士像  
如是山林大海中 應是諸惡皆消滅  
觀音志心聽我語 地藏無量不思議  
百千萬劫說不周 廣宣大士如是力

地藏名字人若聞 乃至見像瞻禮者  
香花衣服飲食等 供養百千受妙樂  
若能以此迴法界 畢竟成佛超生死  
是故觀音汝當知 普告恆沙諸國土

囑累人天品第十三

爾時世尊舉金色臂。又摩地藏菩薩摩訶薩  
頂。而作是言。地藏地藏。汝之神力。不可思議。  
汝之慈悲。不可思議。汝之智慧。不可思議。汝

之辯才不可思議。正使十方諸佛讚歎宣說。汝之不思議事。千萬劫中不能得盡。地藏地藏。記吾今日在忉利天。於百千萬億不可說不可說。一切諸佛菩薩及天龍八部大會之中。再以人天諸眾生未出三界在火宅中者。付囑於汝。無令諸眾生等墮惡趣中。一日一夜。何況更落五無間及阿鼻地獄。動經千萬億劫。無有出期。地藏。是南閻浮提眾生志性

無定習惡者多。縱發善心。須臾即退。若遇惡緣。念念增長。以是之故。吾分是形。百千萬億教化。隨其根性而度脫之。地藏。吾今殷勤以天人眾付囑於汝。未來之世。若有天人及善男子善女人。於佛法中種少善根。一毛一塵一沙一滴。汝以道力擁護是人。漸修無上。勿令退失。復次。地藏。未來世中。若天若人。隨業報應當墮惡趣。臨墮趣中。或至地獄門首。是

諸眾生若能念得一佛名。一菩薩名。一句一偈大乘經典。是諸眾生。汝以神力方便救拔。於是人所現無邊身。為碎地獄。遣令生天。受勝妙樂。爾時世尊而說偈言。

現在未來天人眾 吾今殷勤付囑汝  
以大神通方便力 勿令墮在諸惡趣

爾時地藏菩薩摩訶薩。胡跪合掌。白佛言。世尊。惟願世尊。不以為慮。未來世中。若有善男

子。善女人。於佛法中。一念恭敬。我亦百千方便。度脫是人。於生死中。速得解脫。何況聞諸善事。念念修行。自然於無上道。永不退轉。說是語時。會中有一菩薩。名虛空藏。白佛言。世尊。我至忉利。聞於如來。讚歎地藏菩薩威神之力。不可思議。未來世中。若有善男子。善女人。乃及一切天龍。聞此經典。及地藏菩薩名字。受持供養。瞻禮形像。得幾種福利。惟願世

尊爲未來現在一切眾等略而說之。佛告虛空藏菩薩言。諦聽諦聽。吾當爲汝分別說之。若未來世有善男子善女人。見地藏菩薩形像。及聞此經。乃至讀誦香花飲食衣服珍寶布施供養讚歎瞻禮。得二十八種利益。一者天龍護念。二者善果日增。三者集聖上因。四者菩提不退。五者衣食豐足。六者疾病不臨。七者離水火災。八者無盜賊厄。九者人見欽

敬。十者神鬼助持。十一者女轉男身。十二者爲王臣母。十三者端正相貌。十四者多生天上。十五者或爲帝王。十六者宿命通達。十七者有求皆得。十八者眷屬歡昌。十九者諸橫消滅。二十者業道永息。二十一者去處盡通。二十二者夜夢安祥。二十三先亡離苦。二十四者宿福受生。二十五者諸聖讚揚。二十六者聰明利根。二十七者饒慈愍心。二十八

者畢竟成佛。復次虛空藏。若現在未來。天龍鬼神。聞地藏菩薩名號。禮地藏菩薩形像。或聞地藏菩薩本願等事。修行讚歎瞻禮。得七種利益。一者速超聖地。二者惡業消除。三者諸佛護臨。四者菩提不退。五者增長本力。六者宿命皆通。七者畢竟成佛。爾時十方一切諸來不可說不可說諸佛如來。及大菩薩。天龍八部。聞釋迦牟尼佛。稱揚讚歎地藏菩薩。

大威神力。不可思議。歎未曾有。是時忉利天。雨無量香華。天衣瓔珞。供養釋迦牟尼佛。及地藏菩薩已。一切眾會。俱復瞻禮。合掌而退。

七佛滅罪真言 三遍

離婆離婆帝。求訶求訶帝。陀羅尼帝。尼訶囉帝。毗黎你帝。摩訶伽帝。真陵乾帝。莎婆訶。

讚

地藏本誓。校量經因。癡殘瘖瘂。是前生。今世

地持經卷下  
諷大乘。福利無窮。決定寶蓮生。

南無常住十方僧 三稱


地藏菩薩本願經卷下 終

重刻地藏經跋語

地藏經。人目之爲小乘。乃大乘通教。部屬方等。所謂通教者。通大小乘也。故知法無大小。大小在人。如

世宗憲皇帝云。朕嘗謂佛法分大小乘。乃接引邊事。其實小乘。步步皆是大乘。大乘的的不離小乘。不履小乘。則亦未曾究竟大乘。如人說食。終不充饑。此真聖人之語也。





讚禮地藏菩薩懺願儀

明菩薩沙彌古吳智旭述

行者淨身口意。至尊像前。應念我及眾生。積迷造罪。無救無歸。大士洪慈。為歸為救。又念大士法身。及十方三寶。體常徧滿。無所不在。與我現前。心性平等。無二起深信。解如奉慈顏。敷具拱立。唱云。

一切恭敬。

一心頂禮十方常住三寶。

總一禮已。嚴持香華。如法供養。唱云。

願此香華雲徧滿十方界。供養一切佛尊法。

也哉。戴頂義。

七一

諸賢聖無邊佛土中受用作佛事。

至此停唱燒香散華。

至心想云

一切佛法僧寶體常徧滿無所不在願令以此香華等同法性普熏一切諸佛刹土施作佛事十方一切供具無時不有我今當以十方所有一切種種香華瓔珞幢幡寶蓋諸珍妙飾種種音樂燈明燭火飲食衣服臥具湯藥乃至盡十方所有一切種

種莊嚴供養之具憶想遙擬普共眾生奉獻供養一切世界中有修供養者我今隨喜若未修供養者願得開導令修供養又願我身速能徧至一切刹土於一一佛法僧所各以一切種種莊嚴供養之具共一切眾生等持奉獻供養一切諸佛法身色身舍利形像浮圖廟塔一切佛事供養一切所有法藏及說法處供養一切賢聖僧

眾願共一切眾生修行如是供養已漸得成就六波羅蜜四無量心深知一切法本來寂靜無生無滅一味平等離念清淨畢

竟圓滿。想已起云。

供養已一切恭敬。

一禮已次復合掌讚云。

南無地藏菩薩摩訶薩以神通力現聲聞像。是諸微妙功德伏藏。是諸解脫珍寶出處。是諸菩薩明淨眼目。是趨涅槃商人導首。如如

意珠雨眾財寶隨所希求皆令滿足。照行善者猶如朗日照失道者猶如明炬除煩惱熱。如月清涼。渡四流者為作橋梁。趨彼岸者為作船筏。伏諸外道如師子王。降諸天魔如大龍象。護諸怖畏如親如友。防諸怨敵如壑如城。救諸危難猶如父母。藏諸怯劣猶若叢林。令諸有情善根不壞。現妙境界令眾欣悅。勸發有情增上慚愧。求福慧者令具莊嚴。能無

功用轉大法輪。殊勝功德不能測量。久修堅固。大願大悲。勇猛精進。過諸菩薩。於一食頃。至心歸依。稱名念誦。禮拜供養。能令一切皆離憂苦。求諸所願。速得滿足。安置生天。涅槃之道。故我一心歸命頂禮。

讚已一禮。添香致敬。唱云。

一心頂禮。本師釋迦牟尼如來。

拜下。想云。能禮所禮。性空。

寂。感應道交。難思議。我此道場。如帝珠。釋迦如來。影現中。我身影現如來前。頭面接足。歸命禮。下皆準此。唯改佛名。

一心頂禮。過去師子奮迅具足萬行如來。覺

華定自在王如來。

一心頂禮。一切智成就如來。清淨蓮華目如來。

一心頂禮。無邊身如來。寶性如來。波頭摩勝如來。師子吼如來。

一心頂禮。寶勝如來。寶相如來。袈裟幢如來。大通山王如來。

一心頂禮淨月佛山王佛智勝佛淨明王佛  
智成就佛無上佛妙聲佛滿月佛月面佛  
如是等不可說諸佛如來。

一心頂禮拘留孫佛毗婆尸佛等七佛如來。

一心頂禮普光佛等五十三佛如來。

一心頂禮過去苑伽沙等諸佛如來。

一心頂禮忉利天宮十方集會無量世界不  
可說不可說一切諸佛如來。

一心頂禮未來淨住世界安樂劫中無相如  
來及十方三世一切諸佛如來。

一心頂禮十方一切諸佛所有色身舍利形  
像浮圖廟塔一切佛事。想云諸佛法身如  
虛空。化事住世難

思議我皆影現化事  
前。一一皆悉歸命禮。

一心頂禮地藏菩薩本願經大乘大集地藏  
十輪經占察善惡業報經及十方三世一  
切法藏。總三禮。想云真空法界如虛空。常  
住法寶難思議我皆影現法寶前。

莫不皆悉  
歸命禮。

一心頂禮文殊師利菩薩財首菩薩定自在

王菩薩摩訶薩

想偈如佛。但改菩  
薩名字。下皆倣此。

一心頂禮無盡意菩薩解脫菩薩普賢菩薩  
摩訶薩。

一心頂禮普廣菩薩觀世音菩薩虛空藏菩  
薩摩訶薩。

一心頂禮好疑問菩薩彌勒菩薩金剛藏菩

薩堅淨信菩薩摩訶薩。

一心頂禮十方三世一切菩薩摩訶薩。

一心頂禮。憍陳那尊者。優波離尊者。目乾連  
尊者。一切聲聞緣覺賢聖僧。

一心頂禮。忉利宮中分身來集。地藏菩薩摩  
訶薩。

一心頂禮。大集會中。現聲聞相。地藏菩薩摩  
訶薩。

五藏惟願信  
六  
一心頂禮。占察經中善安慰說。地藏菩薩摩訶薩。

一心頂禮。人能發智定。地藏菩薩摩訶薩。

一心頂禮。入具足無邊智定。地藏菩薩摩訶薩。

一心頂禮。入具足清淨智定。地藏菩薩摩訶薩。

一心頂禮。入具足慚愧智定。地藏菩薩摩訶

薩。

一心頂禮。入具足諸乘明定。地藏菩薩摩訶薩。

一心頂禮。入無憂神通明定。地藏菩薩摩訶薩。

一心頂禮。入具足勝通明定。地藏菩薩摩訶薩。

一心頂禮。入普照諸世間定。地藏菩薩摩訶

薩。

一心頂禮入諸佛燈炬明定地藏菩薩摩訶薩。

一心頂禮入金剛光定地藏菩薩摩訶薩。

一心頂禮入智力難推伏定地藏菩薩摩訶薩。

一心頂禮入電光明定地藏菩薩摩訶薩。

一心頂禮入具足上妙味定地藏菩薩摩訶

薩。

一心頂禮入具足勝精氣定地藏菩薩摩訶薩。

一心頂禮入上妙諸資具定地藏菩薩摩訶薩。

一心頂禮入無諍智定地藏菩薩摩訶薩。

一心頂禮入能引勝踊躍定地藏菩薩摩訶薩。



一心頂禮入具足世路光定地藏菩薩摩訶薩。

一心頂禮入善住勝金剛定地藏菩薩摩訶薩。

一心頂禮入增上觀勝幢定地藏菩薩摩訶薩。

一心頂禮入具足慈悲聲定地藏菩薩摩訶薩。

一心頂禮入引集諸福德定地藏菩薩摩訶薩。

一心頂禮入海電光定地藏菩薩摩訶薩。

一心頂禮能入如是苑伽沙等諸定成熟一切有情地藏菩薩摩訶薩。

一心頂禮以諸定力除刀兵劫地藏菩薩摩訶薩。

一心頂禮以諸定力除疫病劫地藏菩薩摩訶薩。

訶薩。

一心頂禮。以諸定力。除饑饉劫。地藏菩薩摩

訶薩。

禮竟如前想偈  
畢復作是念。

我及眾生。無始常為三業六根重罪所障。不見諸佛。不知出要。但順生死。不知妙理。我今雖知。猶與眾生同為一切重罪所障。今對地藏十方佛前。普為眾生歸命懺悔。惟願加護。令障消滅。作是念已。  
胡跪唱言。

普為法界一切眾生。悉願斷除三障。歸命懺

悔。

唱已。五體投地。復作是念。

我與眾生。無始來今。繇愛

見故。內計我人。一外加惡友。二不隨喜他

一毫之善。三惟徧三業。廣造眾罪。四事雖

不廣。惡心徧布。五晝夜相續。無有間斷。六

覆諱過失。不欲人知。七不畏惡道。八無慚

無愧。九撥無因果。十故於今日。深信因果。

一生重慚愧。二生大怖畏。三發露懺悔。四

斷相續心。五發菩提心斷惡修善。六勤策  
 三業翻昔重過。七隨喜凡聖一毫之善。八  
 念十方佛有大福慧能救拔我及諸眾生  
 從二死海置三德岸。九從無始來不知諸  
 法本性空寂廣造眾惡今知空寂為求菩  
 提為眾生故廣修諸善徧斷眾惡。十惟願  
 地藏慈悲攝受。作是念已應起胡跪唱言。  
 至心懺悔我弟子某甲與法界眾生自迷法

性枉受輪迴無明覆心不知出要懷聰明慢  
 自實愚癡聞大乘法謬生空解撥無因果斷  
 滅善根遠離正信遠離正願離正意樂及以  
 正見遠善知識好處好時遠離淨戒正定正  
 慧隨逐惡友起諸邪見造身語意無量罪業  
 或復毀謗大乘正法或復毀謗獨覺乘法或  
 復毀謗聲聞乘法障蔽隱沒不令流布或復  
 於彼諸佛弟子若是法器若非法器具戒破

戒。下至無戒。著片袈裟。剃鬚髮者。多行忿恨。訶罵毀辱。譏刺誹謗。隱善揚惡。以麤惡言。期剋迫。打棒傷害。侵奪衣鉢。侵奪資生。絕其飲食。退令還俗。脫其袈裟。枷鎖繫縛。禁閉牢獄。輕慢觸惱。令不安樂。奪奪堵波。及僧祇物。十惡五逆。至一闡提。乘此業緣。於無量劫。墮諸惡趣。備歷三塗。受種種苦。楚痛難言。設得值遇無量諸佛。及大菩薩。親承供養。發露懺

除。復更護持。無量道法。修學無量難行苦行。由彼業障有餘未盡。令我等輩。未能證得安樂涅槃。未能證得三摩地門。殊勝功德。今向地藏菩薩摩訶薩。及諸佛世尊。發大乘心。弘如來教。爲令此土三寶種性。威德熾盛。久住世故。爲欲摧滅一切眾生。堅固煩惱。令無餘故。與諸眾生。復深慚愧。發露懺悔。求悉消除。惟願

十方諸大慈尊及地藏大士哀愍覆護濟拔我等令此罪障皆得除滅永不復受惡趣苦果我等今者對世尊前及與大士以至誠心發真誓願從今以去乃至菩提常願不遇如是惡緣決定不造如是重罪終不毀謗諸佛正法亦不觸惱諸出家人必不挑壞眾生法眼亦不斷滅三寶種性惟願世尊及與大士攝受證知所發誓願令我等

早成十法及成十輪獲得無罪正路法忍於三乘法若三乘人及非法器得無誤失於大乘法昇進無轉利慧勝福常得增長於一切定諸陀羅尼諸忍諸地速得自在常得值遇諸善知識常得不離見一切佛及諸菩薩聲聞弟子不離聞法不離親近供養眾僧於諸善根常能精進菩提行願無厭足心先所造惡摧壞散滅速能證得無上法輪善巧方便

成熟眾生皆令獲得利益安樂

或一說或三說起立唱云

懺悔發願已歸命禮三寶

一禮已起立正身運想一切三寶徧

滿虛空安坐法座一一迴身如法旋遶此

身如影音聲如響普徧十方上供三寶下警羣靈勿令心散和雅唱云

南無十方佛

南無十方法

南無十方僧

南無本師釋迦牟尼佛

南無地藏菩薩

本願經

南無大乘大集地藏十輪經

南

無占察善惡業報經

南無地藏菩薩摩訶

薩

或三稱或七稱旋遶既畢迴身至法座前正立至心唱云

自歸依佛當願眾生體解大道發無上心

自歸依法當願眾生深入經藏智慧如海

自歸依僧當願眾生統理大眾一切無礙

和南聖眾

問訊畢次至靜室或念地藏菩薩名或持滅定業真言或觀大士平等法身或作唯心識等二種觀道唯信唯篤則必能滅障必證法忍矣

後序

嗚呼大法久湮人多謬解執大謗小舉世皆

然寧知地獄眾苦已隨其後。瘖瘂餘報復更難窮。故我地藏慈尊於大集會中現聲聞相。而世尊廣歎勝德。且爲之較量云。假使有人於彌勒妙吉祥并觀自在普賢之類。殫伽沙等大菩薩所。於百劫中至心歸依稱念禮供。求諸所願。不如有人於一食頃歸依稱念禮供地藏以菩薩久修堅固大願大悲勇猛精進。過諸菩薩故也。蓋末世之中。駕言於大乘

甚易而躬行於僧行實難。寧知廢小談大。并其大而亦非。悟大用小。并其小而亦大。故法華誠弘經者。必依四安樂行。涅槃極談常住佛性。尤扶戒律。今大士之功德獨盛。得非亦在此乎。智旭深恨夙生惡習。少年力詆三寶。造無間罪。賴善根未殞。得聞本願尊經。知有出世大孝。乃轉邪見而生正信。仍以謗法餘業。雖辛勤修證。不登法忍。每一展讀大士三

經。輒不禁涕泗橫流。悲昔日之無知。感大士之拯拔也。因念濁智流轉之日。與我同此過者不少。敬宗十輪。并占察本願二典。述此儀法。庶幾共滌先愆。克求後果。不終為無依行乎。未登無生正位。皆可修之。無論初心。與久學也。

募刻地藏經并懺功德芳名

比邱文質	捐洋伍元	聯端	各洋肆元
法正	履葦	月澄	海曙
各捐洋貳元		亦輝	安隱
悟禪	蓮塘	妙一	了願
志西	蓮生	隱塵	智海
鵬真	嵩泉	如定	印安
智量	法航	法本	法傳
行初	同初	德生	玉峰
各捐洋壹元		德生	心聰
圓寂	比邱佛慶	宏燦	各捐洋壹元
比邱尼宗儒	自修	德華	滿定
福慧	恆如	本志	能守
三寶信士張大年	捐洋拾元	賈懷	玉捐洋貳元
復初子	季心德	陳智景	楊貴寶



趙貴發 秦學耕 王榮正 殷證禪  
于啟龍 隱姓氏 無名氏 無名氏

各捐洋壹元 劉智定 李廣祥  
各捐洋伍角 戈智凡 四百文

陸智成 邱智化 各捐錢四百八十文  
三寶信女徐慧福 王馮氏 樂王氏 各捐洋貳元

陳丁氏 儲賈氏 袁賈氏 王朱氏  
馮強氏 潭汪氏 各捐洋壹元 聞善二元二角

敢姑娘捐洋五角 無名氏三角  
道齊捐錢四百八十文 石花氏四百文

共收大洋壹百零伍元五角 小洋叁角  
錢貳千二百四十文

計刻此經連圈計字貳萬伍千七百八十箇

付刻資洋柒拾七元三角四分 書籤三條 板架一張 作貳元

餘資印功德書送訖

以上刻經功德泰州南山寺法正老和尚代募為

多合集功德奉申回向伏願

佛光普照於十方慧燈長明於百億風調雨順物阜

民安三災殄息八苦殞消各各現在父母冤親俱

增福壽過去父母冤親速離幽暗同生淨土捐資

人等承茲善力因緣三毒十纏願悉消除福德慧

根咸獲增長四恩三有均沾利樂法界含識共證

菩提

民國十年冬

板存揚州宛虹橋眾香庵經房

揚州東鄉磚  
橋刻經局刊



